

ՄԱՄԻԿՈՆՅԱՆՆԵՐԻ ՏԻՐՈՒՅԹՆԵՐԻ ԽՆԴԻՐԸ
VIII Դ. ՎԵՐՋԻՆ*

ՀԵՆՐԻԿ ԽԱԶԱՏՐՅԱՆ

Բանալի բառեր՝ Մամիկոնյաններ, Բագրատունիներ, Աշոտ Մսակեր, Խալիֆա-
յություն, Արշարունիք, Տայք, Տարոն:

Նախաբան

Հայաստանը 700–885 թթ. այսրկովկասյան երկրների (Քարթլի, Առան, Շիր-
վան և Դերբենդ) հետ Արաբական խալիֆայության Արմինիա փոխարքայութ-
յան մասն էր¹: Համեմատած սասանյան տիրապետության չրջանի՝ արաբական
տիրապետության ժամանակ տեղի նախարարական համակարգում զգալի փո-
փոխություններ էին կատարվել: Դա կապված էր և՛ ավատատիրական հարա-
բերությունների զարգացմամբ, և՛ արաբների վարած ծանր հարկային քաղա-
քականությամբ, և՛ օտար էթնիկ տարրի ներթափանցմամբ:

Արդեն VII դարում նկատվում էր մրցակցություն երկու խոշոր նախարա-
րությունների՝ Մամիկոնյանների ու Բագրատունիների միջև: Իմիջիայրոց, դա
ակնհայտ է դառնում նաև Հայոց իշխանի պաշտոնին տոհմերի հավակնութ-
յուններից: Այդ դարում Հայոց իշխանի պաշտոնը վարում էին Համազասպ
(655–662) և Գրիգոր (662–685) Մամիկոնյաններն ու Աշոտ (685–689) և Սմ-
բատ Բյուրատյան (693–702) Բագրատունիները: Արմինիա ոստիկանության
կազմավորմամբ պատկերը հետզհետե փոխվեց, քանի որ VIII դարում բացա-
ռությամբ Մուշեղ Մամիկոնյանի (748–753) ու Տաճատ Անձևացու (781–785),
Հայոց իշխանի պաշտոնը գտնվում էր Բագրատունիների ձեռքում²: Հայոց իշ-
խանի պաշտոնում Սմբատ Բյուրատյան Բագրատունու երկրորդ կառավարու-
մից սկսած՝ նշանակում կամ ճանաչում էր միայն խալիֆան³:

Կարելի է նկատել, որ տիրելով Հայոց իշխանի պաշտոնին և Խալիֆայութ-
յան հետ մտնելով «լեզու գտնելու» դիվանագիտական հարաբերությունների
մեջ՝ Բագրատունիներն աստիճանաբար պետք է հզորանային ու ընդարձակեին
իրենց հողային տիրույթները:

Մամիկոնյանների տիրույթները

Արդեն V–VII դդ. Մամիկոնյաններին էին պատկանում հսկայական տի-
րույթներ՝ Տայք նահանգը, Տուրուբերան նահանգի՝ Տարոն, Խուլթ, Ասպակուն-

* Ներկայացվել է 21. V. 2024 թ., գրախոսվել է 26. V. 2024 թ., ընդունվել է
տպագրության 10. VII. 2024 թ.:

¹ Ե ղ ի ա գ ա ռ յ ա ն. 2010, 29–30:

² Տ ե ը- Ղ և ո ն դ յ ա ն. 1964, 130:

³ Ю з б а ш я н. 1988, 34.

յաց ձոր, Սասուն, Բզնունիք, Հարք, Արշամունիք գավառները, V–VI դդ. Բարձր Հայք նահանգի Դարանաղյաց և Եկեղյաց գավառների եկեղեցապատկան տիրույթները, ինչպես նաև՝ V դ. կեսերից Մոկք նահանգի Զերմաձոր գավառի մի հատվածը՝ Զուայլ ամրոցով⁴, Այրարատ նահանգի Բագրևանդ գավառը, Արագածոտն գավառի մեծ մասը, Կոտայք գավառի որոշ հատվածները, որի Զափ գյուղը Հայոց իշխան Գրիգոր Մամիկոնյանը նվիրեց պարսիկ Սուրհանին⁵:

Մամիկոնյան նախարարներն այլ տիրույթներ ևս ձեռք բերեցին, մասնավորապես VIII դ. երկրորդ կեսին Արշարունիք գավառում՝ ավելի ստույգ՝ Արտագերս ամրոցն իր հարակից շրջաններով⁶: Այսպես, Ղևոնդ պատմիչը հաղորդում է, որ Հրահատ կոմսի որդի Մուշեղ Մամիկոնյանը կոտորեց արաբ պաշտոնյաներին, որոնք եկել էին իր գավառ՝ Արտավազը Մամիկոնյանի ձեռքով սպանված արաբների արյան վրեժը լուծելու, որից հետո «ինքն գաղթելը յամրոցսն Արտագերսոյ՝ հանդերձ տամբ իւրով»⁷: Դա հանդիսացավ 774–775 թթ. համաժողովրդական մեծ ապստամբության⁸ սկիզբը: Ղևոնդ պատմիչի հաղորդումից պարզ է դառնում, որ Հրահատ կոմս Մամիկոնյանի որդին՝ Մուշեղը, իր գավառում էր իշխում, որը, ինչպես կտեսնենք, Բագրևանդը չէր, որտեղից նա իր տնով (ազգով, տոհմով) տեղափոխվում է Արշարունիք գավառի Արտագերս ամրոցը: Այնուհետև Ղևոնդն Արտագերսը նշում է որպես Մուշեղի ամրոց⁹: Պատմիչի հաջորդ վկայությունից պարզ է դառնում, որ այդ ժամանակ Մուշեղը, Արտագերսից փոքրաթիվ զորքով գնալով Բագրևանդ գավառ, հարկահաններին սրի է քաշել¹⁰:

Ուրեմն, իսկապես, Մուշեղի տիրույթները Բագրևանդից հեռու էին, ըստ երևույթին՝ Տարոնում¹¹: Արշարունիք գավառը պատկանում էր Կամսարական նախարարությունը, որոնք, ինչպես հայտնի է, բարիդրացիական հարաբերություններ ունեին Մամիկոնյանների հետ: Եվ քանի որ Մուշեղ Մամիկոնյանի կողմից արաբներին կոտորելն ազդարարելու էր համահայկական ապստամբության սկիզբը, ապա անհավանական է, կարծել՝ Կամսարականները կարող էին կամովին Մամիկոնյան իշխանին տրամադրել անառիկ Արտագերս ամրոցը: Այստեղ տեղին է մեջբերել Վարդան վարդապետի այն հաղորդումը, որ «և զի Զահապ յափշտակեալ էր մասն ինչ յԱրշարունեաց, և խորհէր տիրել ի ձեռն կնոջն բոլոր աշխարհին»¹²: Պատմիչի հաղորդման այս հատվածը տարակարծությունների առիթ է տվել. հետազոտողների մի մասը կարծում է, որ Զահապի կինը Մամիկոնյան տոհմից էր¹³, իսկ մյուսը՝ Բագրատունի¹⁴: Ահա Վար-

⁴ Х а ч а т р я н. 2022, № 2, 56.

⁵ Վ ա Ր Դ ա Ն յ ա Ն. 2019, 18–33:

⁶ Ա դ ո Ն ց. 2006, 448:

⁷ Ղ ե լ ո Ն Դ Վ ա Ր Դ ա պ ե տ. 2007, 830:

⁸ Վ ա Ր Դ ա Ն յ ա Ն. 2017, 16–27:

⁹ Ղ ե լ ո Ն Դ Վ ա Ր Դ ա պ ե տ. 2007, 831:


¹⁰ Ղ ե լ ո Ն Դ Վ ա Ր Դ ա պ ե տ. 2007, 830:

¹¹ Հայոց պատմություն. 2018, 321:

¹² Հաւաքումն պատմութեան Վարդանայ վարդապետի. 1862, 76:

¹³ Գ Ր Ի Գ Ր Յ ա Ն. 1983, 51, Հայոց պատմություն. 2018, 335:

¹⁴ Գ Ր Ի Գ Ր Յ ա Ն. 2011, 29:



դան վարդապետի հաղորդումը. «Բայց անկեղծն ի մեծ պատերազմին մնացորդք՝ էին այսոքիկ. երկու որդիք Սմբատայ որդւոյ Աշոտի, որոց անուանքն՝ Աշոտ և Շապուհ. և Սամուելի եղբայր մի Շապուհ անուն. Իսկ Մուշեղայ՝ երկու որդիք և չորս դստերք. անդրանկին Շապուհ անուն: Որք անկան յերկիրն Վասպուրական. զորս եսական զերկոսին Մեհրուժան Արծրունի, որպես թէ ի պատճառս հօրն նոցա եղև աղէտն մեծ. և մի ի քերց նոցա ետ զինքն յամուսնութիւն Զահապի ումեմն խմայելացւոյ՝ թիկունս առնելով զնա (ընդգծումը մերն է – Հ. Խ.)»¹⁵: Պատմիչի այս հաղորդումից պարզ հետևում է՝ Մուշեղ Մամիկոնյանի երկու որդիներին, որոնք ապաստանել էին Վասպուրականում, սպանում է Մեհրուժան Արծրունին: Ապա նշվում է, որ նրանց՝ նահատակված Մամիկոնյան եղբայրների մի քույրը, որպես թիկունք՝ մահմեդական Զահապի հետ էր ամուսնացել, որի համար էլ վերջինս «յափշտակեալ էր մասն ինչ յԱրշարունեաց», իրականում, սակայն իր տիրապետութեան տակ էր վերցրել Մամիկոնյաններին պատկանող հատվածը՝ Արտագերս ամրոցն իր շրջակայքով:

Համաձայն Ստեփանոս Ասողիկի՝ Արշարունիքը Կամսարականներից գնել էր Աշոտ Մսակերը¹⁶: Դա պետք է տեղի ունեցած լիներ առնվազն 785 թ. հետո, երբ Հայոց իշխան Տաճատ Անձևացու հետ զոհվեց նաև Ներսէս Կամսարականը¹⁷, որը, ըստ էության, հիշատակվող վերջին Կամսարական նախարարն էր:

Մասնագիտական գրականության մեջ, թերևս, վրիպման հետևանքով ենթադրվել է, որ Աշոտ Մսակերը Շիրակ գավառը ևս գնել էր Կամսարականներից¹⁸: Սակայն Վարդան վարդապետը հստակ նշում է, որ Աշոտ և Շապուհ Բագրատունիները «և եղեալք զկողմամբքն Շիրակայ՝ հարին զգօրսն Խմայելի՝ որ անդ, և զրաւեցին յինքեանս զՇիրակ և զԱշոցք, և զգաւառն Տայոց»¹⁹: Փաստորեն, Շիրակն արաբների ռազմավարման ներքո էր և այդ պատճառով է, որ միայն Արշարունիքն է գնվում Աշոտ Մսակերի կողմից:

Ա. Վարդանյանը գտնում է, որ Զահապն Արշարունիքի Մամիկոնյաններին պատկանող հատվածում տեղ ու տնօրինություն կարող էր անել այն ժամանակ, երբ արդեն կենդանի չէին թե՛ Դավիթ ու Շապուհ Մամիկոնյանները, թե՛ Մուշեղի երկու որդիները²⁰: Այսինքն, Զահապն Աշոտ Մսակերի հետ պետք է բախվեր 786–806 թթ. հետո, երբ Շապուհ և Դավիթ Մամիկոնյաններն այլևս չկային²¹: Այսպիսով տեսնում ենք, որ Զահապի և Աշոտ Մսակերի բախման շարժառիթները, Արշարունիքին տիրելն էր, որն էլ ավարտվում է Բագրատունիների հաղթանակով:

Նկատենք, որ Գաբեղյանը գավառը թյուրիմացաբար համարվել է Մամիկոնյանների տիրույթ²², որտեղ վերջիններիս հաստատվելու վերաբերյալ Վար-

¹⁵ Հաւաքումն պատմութեան Վարդանայ վարդապետի. 1862, 76:

¹⁶ Ստեփանոսի Տարաւեցի Ասողիկ. 2011, 707:

¹⁷ Ղեւոնդ Վարդապետ. 2007, 845:

¹⁸ Հայոց պատմություն. 2018, 333:

¹⁹ Հաւաքումն պատմութեան Վարդանայ վարդապետի. 1862, 76:

²⁰ Վարդանյան. 2016, 48–49:

²¹ Վարդանյան. 2017, 4:

²² Եղիազարյան. 2011, 92, Վարդանյան. 2019, 26:

դան վարդապետը հայտնում է. «Եւ Գրիգոր Մամիկոնեան արիաբար պահեալ զհաւատն երանէ ի բանտեն, և դայ մտանէ ի գաւառն իւր Բագրևանդ, և կամէր ամրանալ ի գաւառն Գաբեղինից ի Գազանածական. որ և զկնի եօթն աւուրց մեռանի»²³: Այստեղ խոսքը գնում է Քուրդիկ Մամիկոնյանի որդու՝ Գրիգորի մասին, ով Բուղայի ձերբակալությունից (850-ական թվականներ) հետո վերադարձել էր իրեն պատկանող Բագրևանդ գավառը: Վերոբերյալից, ի տարբերություն Արշարունիքում ունեցած տիրույթների, ամենևին չի երևում, որ Մամիկոնյաններն այստեղ ամուր հաստատվել կամ տիրել են Գաբեղյանքին, կամ նրա ինչ-որ հատվածին: Գրիգոր Մամիկոնյանը ցանկանում է պարզապես «ամրանալ» Գաբեղյանք գավառում, սակայն յոթ օր անց մահանում է:

VIII դ. Բագրատունիների կողմից Մամիկոնյանների տիրույթներին տիրելու խնդիրը

Մասնագիտական գրականության մեջ տարածված է այն տեսակետը, թե արդեն VIII դ. վերջերին Բագրատունիները տիրել են քայքայված նախարարությունների տիրույթներին: Դրանց մեջ առանձնանում են հատկապես Տայքն ու Տարոնը, որոնք դարեր շարունակ եղել են Մամիկոնյանների տոհմական տիրույթներ: Այս կապակցությամբ Յոզեֆ Մարկվարտը դիպուկ նկատել է, որ դեռևս VII դ. Վարազտիրոց Բագրատունին Տարոնը, ապա Տայքը դիտարկում էր որպես իրեն հուսալի ապաստարան²⁴: Նշենք, որ հետազոտողները միակարծիք չեն, թե երբ են նշված տիրույթները Մամիկոնյաններից անցել Բագրատունիներին: Տայքին անդրադարձած վերջին ուսումնասիրություններում նշվում է IX դ. սկիզբը²⁵ և 775–779 թթ.²⁶, իսկ Տարոնի պարագայում՝ VIII դ. վերջին կամ IX դ. սկզբներին՝ մինչև 804 թ.²⁷, և 806–810 թթ. միջակայքում²⁸:

Մամիկոնյան նախարարության համար ճակատագրական էր 774–775 թթ. հակաարաբական ապստամբությունը, որի արդյունքում տոհմը զրկվեց իր նախկին հզորությունից, իսկ մի փոքր ուշ՝ նաև տիրույթների մեծ մասից: Բագրատունիները, թեև տիրում էին Հայոց իշխանի պաշտոնին, այդուհանդերձ, տիրապետում էին միայն Սպեր, Կոգովիտ, Ծաղկոտն գավառներին ու Բագավանին հարակից շրջաններով²⁹:

VIII դ. վերջերից և մինչև IX դ. սկզբները տևած քաղաքական իրադարձությունների արդյունքում Բագրատունիները հնարավորություն ստացան ընդարձակելու իրենց հողային տիրույթները, որն իրականացրեցին 775 թ. Արձնիի ճակատամարտում զոհված Հայոց իշխան և սպարապետ Սմբատ Բագ-

²³ Հաւաքումն պատմութեան Վարդանայ վարդապետի. 1862, 81:

²⁴ Մ ա Ր Կ ո լ ա Ր տ. 1913, 34:

²⁵ Ե Ղ Ի ա զ ա Ր յ ա ն. 2014, 51:

²⁶ Ն ա զ ա Ր յ ա ն. 2019, 220:

²⁷ Գ Ր Ի գ ո Ր յ ա ն. 1983, 55:

²⁸ Վ ա Ր Ղ ա ն յ ա ն. 2016, 50:

²⁹ Ըստ էություն, Բագրատունյաց տոհմի տարածքային աճը սկսվեց Աշոտ Մսակերի ժամանակ (Ե Ղ Ի ա զ ա Ր յ ա ն. 2011, 29, 81, 88):

րատունու որդիները՝ Աշոտ Մսակերն ու Շապուհը: Այս առթիվ Վարդան վարդապետը հաղորդում է. «... և ելեալք զկողմամբքն Շիրակայ՝ հարին զգորսն Իսմայելի՝ որ անդ, և գրաւեցին յինքեանս զՇիրակ և զԱշոցք, և զգաւառն Տայոց: Եւ այսպէս ըստ բախտին ելեալ Աշոտի քաջի՝ շինէ զԿամախ, և բնակեցուցանէ ի նմա զընտանիս իւր...»³⁰: Այսինքն՝ Տայքը գրավել են Աշոտն ու Շապուհը, որից հետո Աշոտը, կառուցելով Կամախ՝ իրականում Կալմախ ամրոցը, այնտեղ է բնակեցրել իր ընտանիքը: Այս հաղորդումը, ճիշտ է, խոսում է Տայքի՝ Բագրատունիներին անցնելու փաստի մասին, սակայն ժամանակագրութիւն չկա, թե մոտավոր ե՞րբ դա կարող էր տեղի ունեցած լինել: Հաջորդիվ՝ Վարդան վարդապետը նշում է, որ Աշոտ Մսակերը «... երթեալ հազար արամբ յԱղիովիտ գաւառ, և առ ինքն գումարեալ զամենայն աղխիւն իւրեանց (Գնունիներին— չ. Խ.), տանի բնակեցուցանէ ի Տայս»³¹: Այս հաղորդումից հետևում է, որ Գնունյաց տոհմին օգնութեան գալու ժամանակ Տայքն արդեն Աշոտի իշխանութեան տակ էր գտնվում:

Հարցի քննութեան համար կարևոր է Աշոտ Մսակերի կառավարման գոնե մոտավոր թվականների ճշգրտումը: Առաջինը հիշատակում է Ասողիկը. «Իսկ ըստ իշխանաց կարգին գկնի Սմբատայ որդւոյ Աշոտոյ՝ Աշոտ որդի նորա, որ Մսակեր կոչուր՝ ամս Ի»³²: Ինչպես երևում է, պատմիչն Աշոտ Մսակերի իշխանութիւնը դնում է հորից անմիջապես հետո, ինչը ճիշտ չէ: Աշոտ Մսակերին հիշատակում է նաև Սամվել Անեցին, որը, ի տարբերութիւն Ասողիկի, նշում է թվական. «801 (արդի թվական), 803 (փրկչական թվական) — Աշոտ որդի Սմբատա՝ Մսակերն (Հայոց) ամս Ի (20)»³³: Սակայն, այս դեպքում կստացվի, թե Աշոտ Մսակերը կառավարել է մինչև 821 թվականը (801+20), ինչը ևս ճիշտ չէ: Ասողիկի այն հաղորդումը՝ Աշոտին հաջորդեց որդին՝ Սմբատ Աբլաբասը, որը Հայոց 275 թ. (=արդի թվականի 826) ազատվեց գերութիւնից և եկավ Հայաստան³⁴, փաստում է՝ Աշոտի վախճանի թվականը պետք է լիներ 826 թ.: Եթե Աշոտ Մսակերի վախճանը 826 էր և կառավարել էր 20 տարի, ինչպես նշում են աղբյուրները, ապա նրա կառավարման սկիզբ է դառնում ոչ թե 801, այլ՝ 806 թ.: Ամեն պարագայում ակնհայտ է, որ նրա կառավարումը սկսվում է IX դ. սկզբին, որից հետո էլ, ինչպես կտեսնենք ստորև, նա տիրացավ Մամիկոնյանների հինավուրց տիրույթներին:

Անդրադառնալով Աշոտ Մսակերի կողմից նոր տիրույթների գրավմանն ու դրանց հերթականութեանը՝ պետք է դիմենք Ասողիկի և Վարդան վարդապետի հաղորդած տեղեկութիւններին: Ասողիկի համաձայն. «Սա (Աշոտ Մսակերը — չ. Խ.) գանձագին արար զգաւառն Արշարունեաց յազգէն Կամսա-

³⁰ Հաւաքումն պատմութեան Վարդանայ վարդապետի. 1862, 76:

³¹ Հաւաքումն պատմութեան Վարդանայ վարդապետի. 1862, 77:

³² Ստեփանոսի Տարաւնեցի Ասողիկ. 2011, 707:

³³ Սամուէլ Անեցի եւ շարունակողներ. 2014, 161:

³⁴ Ստեփանոսի Տարաւնեցի Ասողիկ. 2011, 707: Իրականում Հայոց իշխանը ոչ թե Սմբատն էր, այլ Աշոտի ավագ որդին՝ Բագարատը, որն էլ հետո դարձավ նաև Իշխանաց իշխան (Իրասխանակերտցի. 2010, 429, Թովմա Արծրունի եւ Անանուն. 2010, 141):

րականաց եւ զարքունիան ի Կոգովտէ յԱրշարունիս փոխեաց (ընդգծումը մերն է – չ. Խ.)»³⁵: Իսկ ըստ Վարդան վարդապետի. «... և երեւիք (Աշոտ Մսակերն ու Շապուհը – չ. Խ.) զկողմամբքն Շիրակայ՝ հարին զգօրսն Իսմայելի՝ որ անդ, և գրաւեցին յինքեանս զՇիրակ և զԱշոցք, և զգաւառն Տայոց»³⁶: Վերոնշյալ հաղորդմամբ՝ Ասողիկը մատնանշում է, որ Արշարունիքը (մի մասը) գնելուց Աշոտն արդեն Հայոց իշխան էր, քանզի «արքունիք» տեղափոխելը պետք է վերաբերեր իշխանական նստոցին³⁷: Այստեղից կարող ենք եզրակացնել, որ հաստատվելով արաբների կողմից որպես Հայոց իշխան՝ Աշոտ Մսակերը լծվեց Բագրատունիների հողային տիրույթների ընդարձակման գործընթացին: Եվ սա պատահական չէ, որ հենց Արշարունիքն էր առաջին տիրույթը, որը ձեռք բերեց Աշոտ Մսակերը, քանի որ Կոգովիտիում ամրացած Աշոտը չէր կարող առանց Արշարունիքի գրավել Շիրակը, Աշոցքն ու Տայքը: Նկատենք նաև, որ Աշոտ Մսակերը հանգիստ կարող էր գանձագին ձեռքբերել Արշարունիքն առանց Հայոց իշխան լինելու, քանի որ դա հողատիրության հիմնական ձևերից էր: Վերոնշյալից կարող ենք եզրակացնել, որ Աշոտ Մսակերը IX դ. սկզբին կարգվելով երկրի կառավարիչ՝ Հայոց իշխան, իրականացրել է Բագրատունյաց տոհմական տիրույթների ընդարձակում:

Այս համատեքստում Գնունյաց տոհմի՝ Աշոտի օգնությունը դիմելը, կարծում ենք, ընդգծում է նրա կարգավիճակը՝ Հայոց իշխան լինելը, այլապես տրամաբանական կլիներ օգնություն ակնկալել ավելի մոտ գտնվող ու ոչ պակաս հզոր Վասպուրականի Արծրունի իշխանից: Այս հարցադրումը պատահական չէ, քանի որ IX դարում Գնունիների մի ճյուղը հիշատակվում է Վասպուրականի իշխանության մեջ³⁸: Կարծում ենք, անտեսվում է նաև այն փաստը, որ Արմինիա վարչական միավորի գերագույն տեղը խալիֆն էր և առանց նրա հրամանագրի ոչ մի նախարար ժառանգապես չէր իշխի իր տիրույթում: Պարզապես հարց է ծագում՝ ոմն գահերեց իշխան ի՞նչ հիմքով պետք է մի ամբողջ տոհմ արաբական նախարարակործան քաղաքականությունից ազատեր նրանց Աղիովիտից տեղափոխելով Տայք և հանդիպել պատժիչ գործողությունների: Վարդան վարդապետի այդ անուղղակի տեղեկությունը, ըստ երևույթին, խոսում է Աշոտ Մսակերի պաշտոնական կարգավիճակի մասին, որն էլ ինքնին բացառում է Գնունիների այդ տեղափոխումը թվագրել 785–790 թթ.³⁹:

Նկատենք, որ Աշոտ Մսակերի հայրը՝ Սմբատ սպարապետը, ապստամբություն մասնակիցների շարքում էր, և արաբները դա չէին մոռացել. այս առումով Բագրատունիների տոհմն այնքան էլ շահեկան վիճակում չէր: Ու ամենևին պատահական չէր, որ 775 թ. ճակատամարտից հետո ապստամբության մասնակիցներ Վասակ և Ատրներսեհ Բագրատունիները հեռացան Տայք՝ խուսա-

³⁵ Ստեփանոսի Տարաւնեցի Ասողիկ. 2011, 707:

³⁶ Հաւաքումն պատմութեան Վարդանայ վարդապետի. 1862, 76:

³⁷ Այս մասին մեր բանավոր զրույցի ընթացքում նշել է պ. գ. դ. Ա. Եղիազարյանը:

³⁸ Թովմա Արծրունի եւ Անանուն. 2010, 143, 173:

³⁹ Тер-Гевондян. 1977, 125; Հմմտ. Հայոց պատմություն. 2018, 333:

փելով արաբների վրեժխնդրությունից: Արաբները, մի տարածաշրջանում, ուր մեծ կորուստների գնով վերականգնել էին իրենց տիրապետությունը, թույլ չէին տա Աշոտ Մսակերին միավորիչ որևէ գործողություններ կատարել՝ առանց իրավական հիմքի և ռազմական ուժի, իսկ հիմքը դա արաբների կողմից ընկալելի լինելն էր, այսինքն՝ Աշոտը պետք է նշանակվեր Հայոց իշխան:

Այսպիսով IX դ. սկզբին նշանակվելով Հայոց իշխանի պաշտոնին՝ Աշոտ Մսակերն իշխանական պաշտոնական նստոցը տեղափոխում է Արշարունիք, ընդ որում՝ վերջինս կարող էր ձեռք բերվել նախքան Հայոց իշխան կարգվելը, քանի որ գանձագիրն էր: Այնուհետև եղբոր՝ Շապուհի հետ գրավում է Շիրակը, Առոցքն ու Տայքը: Նվաճումների այս երթուղին հուշում է, որ այն IX դարից շուտ չէր կարող լինել, իսկ Տայքից հետո հաջորդ գավառը Տարոնը պետք է լիներ: Դրա օգտին է խոսում Վարդան վարդապետի հետևյալ տեղեկությունը. «Բայց տունն Ջահապալ զօրացեալ ի Դուին, իբրև հինգ հազարաւ կամեցան գնալ ի Տարօն, յիշխանութիւնն Աշոտոյ որդւոյ Սմբատայ»⁴⁰: Այս անցքերը, ինչպես կարծում է Գ. Գրիգորյանը, տեղի են ունեցել 813 թ.⁴¹, ինչն էլ օրինաչափորեն ցույց է տալիս, որ Տարոնը IX դ. սկզբին է անցել Աշոտ Բագրատունուն:

Տայքի ձեռքբերման հետ կապված կատարենք կարևոր դիտարկում՝ դրան ժառանգական իրավունքով Աշոտ Բագրատունու տրեղուն⁴²: Ըստ Վարդան վարդապետի հաղորդման. «Ե զի Ջահապ յափշտակեալ էր մասն ինչ յԱրշարունեաց, և խորհէր տիրել ի ձեռն կնոջն բոլոր աշխարհին, զայն առին Աշոտ և Շապուհ»⁴³ (ընդգծումն մերն է — Ն. Խ.): Այստեղ «տիրել ի ձեռն կնոջն» կապակցությունից կարող ենք բխեցնել, որ խոսքը ժառանգական իրավունքի մասին է, և Ջահապը, լինելով գոհված Մուշեղ Մամիկոնյանի փեսան, ժառանգական իրավունքով հավակնում էր տրեղ Արշարունիքի մյուս մասին: Այսպես, սա ակներև խոսում է՝ ժառանգական իրավունքը գործում էր, ինչից էլ կարող ենք հետևություն անել, որ Աշոտ Մսակերը, լինելով Սամուել Մամիկոնյանի թուր⁴⁴, ևս կարող էր ժառանգական իրավունքով հավակնել Մամիկոնյանների կալվածքներին: Ընդ որում, ժառանգական իրավունքի առկայությունը չէր ենթադրում այդ տարածքների «լուռ» հանձնում Բագրատունիներին: Լինելով ժառանգության հավանական թեկնածու՝ Աշոտը, որպես գերակա, գենքի ուժով տիրեց Տայքին, ինչն իրավաչափ էր և չառաջացրեց ոչ մի դժգոհություն⁴⁵: Մեկ հանգամանք ևս. Աշոտ Մսակերն իր եղբոր հետ կա-

⁴⁰ Հաւաքումն պատմութեան Վարդանայ վարդապետի. 1862, 78:

⁴¹ Գրիգորյան. 1983, 54–55:

⁴² Եղիազարյան. 2011, 121: Հմմտ. Գրիգորյան. 1983, 53:

⁴³ Հաւաքումն պատմութեան Վարդանայ վարդապետի. 1862, 76:

⁴⁴ Ղևոնդ պատմիչը, թվարկելով մահացած զորագլուխներին, նշում է. «...ի տանէն Մամիկոնեանց Մուշեղ զաւրափար (Տարոնի ճյուղ — Ն. Խ.) եւ Սամուէլ տէր Մամիկոնէից (Տայքի ճյուղ — Ն. Խ.), աներ սպարապետին մեծի (Սմբատ Բագրատունու — Ն. Խ.)» (տե՛ս Ղևոնդ Վարդապետ. 2007, 838):

⁴⁵ 786 թ. Վասպուրականի վերակացու կարգվեց Դավիթ Մամիկոնյանը (Վկա-յաբանութիւն սրբոց իշխանացն Համազասպայ եւ Սահակայ Արծրունեաց. 2007, 954): Այդ նույն թվականին սպանվեցին Մուշեղ Մամիկոնյանի երկու որդիները,

րող էր դիմադրել ու հաղթել արաբ Ջահապին իրավական հիմքի առկայությամբ՝ պայմաններում, հակառակ դեպքում արաբական գաղութներ ստեղծող, նախարարական համակարգը քայքայող ինստիտուցիաները հազիվ թե ձեռնպահ մնար իր իսկ հովանավորյալներին օգնելուց: Սա խոսում է այն մասին, որ Աշոտ Բագրատունին ուներ Հայոց իշխանի կարգավիճակ, որը ենթադրում էր նաև՝ նա հայկական տիրույթների մեջ ապրող արաբական տարրի իշխանն էլ էր: Այսինքն՝ տեղի ունեցավ ավատատիրական կարգերին հատուկ գերակայի ու ստորակայի միջև բախում, որն էլ ավարտվեց Բագրատունիների հաղթանակով՝ հող նախապատրաստելով հետագա գրավումների համար:

Եզրակացություն

Մամիկոնյանները VIII դ. վերջին իրենց տիրույթներին միացրեցին Արշարունիք գավառում գտնվող Արտազերս ամրոցն իր շրջակայքով: Ստույգ հնարավոր է՞ ասել, թե հսկայական այն տիրույթները, որոնց տիրում էին Մամիկոնյաններն առավել վաղ, նույնությամբ պահպանվել էին մինչև IX դարը, թե ոչ: Արձնիի 775 թ. ճակատամարտի պարտությունից հետո, ճիշտ է, ի տարբերություն Կամսարականների, Խոռխոռունիների, Ռշտունիների և այլ տների, Մամիկոնյան նախարարությունը չվերացավ, սակայն խիստ թուլացած առժամանակ դուրս մնաց երկրի քաղաքական ասպարեզից: Արդյունքում՝ Մամիկոնյանները IX դ. սկզբին, երբ Աշոտ Մսակերը նշանակվեց Հայոց իշխան, կորցրին Տալբն ու Տարոնը՝ իրենց ձեռքում պահելով միայն Բագրևանդն ու Սասուն-Խուլթի մի մասը:

Հենրիկ Խաչատրյան – պ. գ. թ., ՀՀ ԳԱԱ պատմության ինստիտուտի միջին դարերի պատմության բաժնի գլխաշխատող: Գիտական հետաքրքրությունները՝ պատմական աշխարհագրություն, Հայաստանի և Իրանի իրավունքի պատմություն: Հեղինակ է 10 հոդվածի: ORCID:0000-0002-8518-9564. henry.khachatryan89@gmail.com

ԳՐԱԿԱՆՈՒԹՅՈՒՆ

Ադոնց Ն. 2006, Երկեր, հ. Ա, Երևան, ԵՊՀ հրատ., 652 էջ:

Գրիգորյան Գ. 1983, Տարոնի Բագրատունիների ֆեոդալական իշխանությունը IX–X դարերում, Երևան, ՀՍՍՀ ԳԱ հրատ., 197 էջ:

Գրիգորյան Մ. 2011, IX դարասկզբի Արշարունիքի տերերի հարցի շուրջ. – «Բանբեր Երևանի համալսարանի», № 1, էջ 26–32:

Եղիազարյան Ա. 2010, Արաբական խալիֆայության Արմինիա վարչական շրջանը, Երևան, ԵՊՀ հրատ., 192 էջ:

Եղիազարյան Ա. 2011, Հայ Բագրատունիների տերությունը (885–908 թթ.), Երևան, ԵՊՀ հրատ., 394 էջ + 6 քարտեզ:

Իսկ Սամուել Մամիկոնյանի եղբոր՝ Շապուհի մասին ոչինչ հայտնի չէ: Ուստի, կարծում ենք, որ Աշոտ Մսակերի դեմ հանդես եկող Մամիկոնյան իշխան չէր լինի):

Եղիազարյան Ա. 2014, Մեծ Հայքի Տայք աշխարհն ըստ «Աշխարհացոյց»-ի. – «Վէմ» (Երևան), թիվ 2, էջ 35–61:

Թովմա Արծրունի եւ Անանուն. 2010, Պատմութիւն տանն Արծրունեաց. – Մատենագիրք Հայոց, հ. ԺԱ, Ժ. դար, Գիրք Ա, Անթիլիաս–Լիբանան, “Armenian Catholicosate of Cilicia”, էջ 46–313:

Հայոց պատմություն. 2018, հ. II, Միջին դարեր. գիրք առաջին (IV դարի սկիզբ–IX դարի կես), Երևան, «Զանգակ» հրատ., 704 էջ + 24 էջ ներդիր:

Հաւաքումն պատմութեան Վարդանայ վարդապետի. 1862, Վենետիկ, Սուրբ Ղազար, 184 էջ:

Ղեւոնդ Վարդապետ. 2007, Պատմաբանութիւն Ղեւոնդեայ մեծի վարդապետի. – Մատենագիրք Հայոց, հ. Զ, Ը. դար, Անթիլիաս–Լիբանան, “Armenian Catholicosate of Cilicia”, էջ 735–851:

Յովհաննէս Դրասխանակերտցի. 2010, Պատմութիւն Հայոց. – Մատենագիրք Հայոց, հ. ԺԱ, Ժ. դար, Անթիլիաս–Լիբանան, “Armenian Catholicosate of Cilicia”, էջ 357–584:

Մարկուարտ Յ. 1913, Ա. Հայ Բագրատունեաց ճիւղագրութիւնը, Բ. Վրական Բագրատունեաց ծագումը, Վիեննա, Մխիթարեան տպ., 160 էջ:

Նազարյան Լ. 2019, Տայքում և Կղարջքում Բագրատունիների վրացական ճյուղի իշխանության հաստատման թվականի շուրջ. – ՊԲՀ, № 2, էջ 211–222:

Սամուէլ Անեցի եւ շարունակողներ. 2014, Ժամանակագրութիւն, աշխատասիրությամբ Կարեն Մաթևոսյանի, Երեւան, «Նաիրի», 504 էջ:

Ստեփանոսի Տարաւնեցի Ասողիկ. 2011, Պատմութիւն տիեզերական. – Մատենագիրք Հայոց, հ. ԺԵ, Ժ. դար, Երեւան, “Armenian Catholicosate of Cilicia”, էջ 639–829:

Վարդանյան Ա. 2016, Տարոն գավառի պատկանելիության հարցի շուրջ (VIII դ. երկրորդ կես – IX դ. սկիզբ). – «Հայոց պատմության հարցեր» (Երևան), հ. 17, էջ 41–51:

Վարդանյան Ա. 2017, Մամիկոնյան իշխանական ընտանիքը Բագրևանդում և Տարոն–Սասունում IX–XII դդ. – «Բանբեր Երևանի համալսարանի», № 2, էջ 3–16:

Վարդանյան Ա. 2019, Մամիկոնյան նախարարական տան տիրույթները. – «Հայագիտության հարցեր», № 1, էջ 18–33:

Վկայաբանութիւն սրբոց իշխանացն Համազասպայ եւ Սահակայ Արծրունեաց. 2007. – Մատենագիրք Հայոց, հ. Զ, Ը. դար, Անթիլիաս–Լիբանան, “Armenian Catholicosate of Cilicia”, էջ 949–966:

Տեր-Ղևոնդյան Ա. 1964, «Հայոց Իշխան»-ը արաբական տիրապետության ժամանակաշրջանում. – ՊԲՀ, № 2, էջ 121–134:

Хачатрян Г. 2022, Нахарарские (княжеские) владения Марзпанской Армении (V–VI вв.). – ИФЖ, № 2, с. 47–62.

Тер-Гевондян. 1977, Армения и Арабский халифат. Ереван, АН АрмССР, 323 с.

Юзбашян К. 1988, Армянские государства эпохи Багратидов и Византия IX–XI вв. М., «Наука», 304 с.

ВОПРОС О ВЛАДЕНИЯХ МАМИКОНЯНОВ В КОНЦЕ VIII В.

ГЕНРИК ХАЧАТРЯН

Резюме

Ключевые слова: Мамиконяны, Багратуни, Ашот Мсакер, Халифат, Аршаруник, Тайк, Тарон.

Начиная с 700–885 гг. Армения вместе со странами Южного Кавказа (Картли, Арран, Ширван и Дербент) представляла собой единую административную единицу Арминия Арабского халифата. Мамиконяны были одним из сильных, если не сильнейшим нахарарским (княжеским) родом, который владел обширными землями. Уже с VII в. видно соперничество между Мамиконянами и нахарарами Багратуни. В VIII в. институт Первенствующего князя (Князь Армении), кроме двух случаев, в основном находился в руках князей Багратуни.

Во второй половине VIII в. Мамиконяны, а точнее их ветвь из Тарона во главе с Мушегом Мамиконяном приобрели крепость Артагерс с сопредельными землями, которая находилась в уезде Аршаруник. После поражения в битве с арабами при Ардзни в 775 г. Мамиконяны на время покинули политическую арену Армении. Хотя они ослабли, так как вложили в битву весь свой военный потенциал, но не исчезли, как нахарарские роды Камсараканов, Хорхоруни, Рштуни и т. д. После битвы участники восстания из рода Багратуни покинули свои владения чтобы избежать мести арабов.

Точка зрения, что Ашот Мсакер Багратуни завладел доменами ослабших Мамиконянов уже вскоре после 775 г., не обоснована. Ашот Мсакер в начале IX в., когда стал Князем Армении, перенес свою резиденцию из уезда Коговит в уезд Аршаруник, часть которого он купил у потомков ослабших Камсараканов. Это опирается на сообщение историка Асогика. Уже после этого Ашот Мсакер как Первенствующий князь начал расширять свои феодальные владения. Вместе со своим братом Шапухом завоевал у араба Джахапа другую часть уезда Аршаруник, который принадлежал Мамиконянам, потому что он был женат на дочери Мушега Мамиконяна и сам планировал завоевать Аршаруник полностью. После этого, они взяли уезд Ширак, Ашоцк и провинцию Тайк. По косвенным сведениям Вардана вардапета можно предположить, что Ашот Мсакер, будучи по материнской линии потомком рода Мамиконянов, мог претендовать на Тайк. Что в конечном счете и случилось: он завоевал Тайк, затем и уезд Тарон. Нельзя точно утверждать, сохранили ли Мамиконяны все свои территории в VIII в. Можно только уверенно сказать, что в начале IX в.

district, which belonged to the Mamikonyans, as he was married to the daughter of Mushegh Mamikonyan and he planned to conquer Arsharunik completely. After that, they took the district of Shirak, Ashotsk and the province of Tayk. According to the indirect information from Vardan Vardapet, one can assume that Ashot Msaker, being a descendant of the Mamikonyan clan on his mother's side, could lay claim to Tayk, which ultimately happened. He conquered Tayk, then the district of Taron. We have no information on whether the Mamikonyans retained all their territories in the 8th century. We can confidently say that at the beginning of the 9th century they lost Tayk, then Taron, eventually retaining only the district of Bagrevand and part of Sasun-Khut.

Henrik Khachatryan – Candidate of Sciences in History, Researcher at the Department of Medieval History of the Institute of History of NAS RA. Scientific interests: historical geography, history of Law of Armenia and Iran. Author of 10 articles. ORCID:0000-0002-8518-9564. henry.khachatryan89@gmail.com